

Segun Miriam Dabian,

Efecto di caso di Natalee Holloway, lo no ta totalmente negativo pa turismo di Aruba

ORANJESTAD (AAN): Un comunicado cu DIARIO a ricibi for di candidato di MPA, Miriam Dabian, ta bisa cu e echo cu un persona actualmente ta desapareci na Aruba ta hopi tristo y preocupante y como humano lo bo no kier algo asina pasa den bo pais y menos cu un persona cu tabatin un bida su dilanti.

Den su comunicado el a sigui bisa cu e ta kere cu e caso di Natalee Holloway no lo perhudica Aruba su turismo, manera ta worde specula.

“Mal publicidad tambe ta publicidad”, esaki ta worde usa den Marketing, segun Dabian.

E echo cu Aruba su nomber a keda manteni pa un tempo asina largo den noticia y imagennan bunita di nos isla a worde pasa pa minuutnan largo den e noticieronan mas mira na nivel mundial, ta aspectonan cu lo yuda posiconar nomber di Aruba den mente di e consumidor viajero, aunque cu e

posiconamento aki a worde genera door di un noticia negativo, pero por worde influencia of mehora cu un bon campaña di publicidad, of door di testimonio di amigo of familiarnan.

Segun Dabian, nos isla tin un historia di mas di 50 aña den e mundo di turismo, unda cu Aruba a haya su posicon como un isla di Caribe bunita, sigur y cu hendenan amable, unda cu un caso aisla, no lo por kibra esaki.

Aruba su turismo ta consisti di un turismo repetitivo di mas di 30 porciento di bishitante cu por y lo duna testimonio, cu Aruba ta un destino sigur, trankil y cu personanan hopi amable.

Esaki ta aspectonan cu a haci Aruba unico y diferencia su mes di otro islanan den Caribe.

E segmento di mercado aki ta di vital importancia, hunto cu

Aruba su website pa duna informacion y testimonio al instante y por genera un cambio di actitud y pensamiento.

Aruba su turismo ta depende di e mercado Mericano cu mas di 70 porciento, cual mercado a haya mas exposicion di e noticia.

E estadistica di luna di Mei cu ta worde prepara door di Aruba Tourism Authority ta mustra un caida pa luna di Mei di 2.44% y especificamente pa e mercado di Merca, un caida di 4%.

E caida aki segun Dabian no por worde adhudica na e caso aki, sino por pensa cu ta logico, ya cu pa e mesun luna di Mei, e hotel Occidental Alegro a cera su portanan cu algo mas di 400 camber.

Esaki segun Miriam Dabian, kende a bisa cu esey ta nifica cu tin un splicacion logico pa e caida.

TELEFONNAN DI DIARIO
582-6747- FAX 582-8551